


# Drents

Van Wikipedia

Dit artikel is gesjreve (of begós) in 't Mestreechs. Laes hie wie v'r mit de versjillende saorte Limburgs ómgaon.

't **Drents** (autoniem *Drèents*) is 'n Nedersaksische dialekgroep kinmerkend veur de Nederlandse provincie Drente.



## Inhawd

**Definitie**

**Indeiling**

**Kinmerke**

Klaanke

Grammair

**Dialekverluus en -behaajd**

**Literatuur en muziek**

**Rifferenties**

**Extern links**

## Definitie

Dao zien twie definities meugelek, 'n geografische en 'n taolkundege definitie. In de ierste definitie is *Drents* gewoen alle dialekte binne de provincie Drente. Dees visie weurt oonder mie aongehaange door de stiechting Drentse Taol.<sup>[1]</sup> Umtot binne de dialekte in Drente evels neet klein versjèlle zien definiëre vööl dialectologe 't Drents lever taolkundeg. De streiktaol besleit daan laank neet gans Drente en 't Drents weurt daan ouch boete de grenze vaan de provincie gesproke.

In de gaankbaar definitie reKent me 't Noordenvelds (gemeintes Noordenveld en Tynaarlo) en 't Veenkoloniaals (noordoostelek Drente) bij 't Gronings en 't Zuidwes-Noord-Drents (veural gemeente Westerveld) bij 't Stellingwerfs. 't Stellingwerfs weurt alternatief ouch es deil vaan de Drentse taolgroep gerekend. E paar dialekte in 't uterste zuidooste, bij Schoonebeek, weure in de indeiling vaan Jo Daan zelfs tot 't Sallands gerekend (vaanwege d'n umlaut in de verkleinwäörd). Wel weer bij 't Drents hure daan de dialekte oet plaatse wie Staphorst, Rouveen, Nieuwleusen, Dedemsvaart, Balkbrug en Slagharen (in de gemeintes Staphorst en Hardenberg, zuug 't keertsje)

## Indeiling

De stiechting Drentse Taol deilt 't Drents es volg op (de ciefers accordere mèt 't keertsje links):

1. Noordenvelds
2. Veenkoloniaals
3. Zuidoos-Veendrents
4. Zuidoos-Zanddrents
5. Midden-Drents
6. Zuidwes-Noord-Drents
7. Zuidwes-Zuid-Drents

Aofgezeen vaan 't feit tot neet al die grope bij 't Drents weure gerekend, deile sommege lui de Drentse dialecte ouch wel anders in, of geve ander naome aon dezelfde grope.

## Kinmerke

---

De taolkundege definitie vaan 't Drents is negatief: Drents zien Nedersaksische dialecte die neet Gronings-Oosfries, neet Sallands en neet Twents-Wesfaals zien. 't Mis de klaankinnovaties vaan 't Gronings en heet ouch geinen umlaut in verkleinwäörd.

## Klaanke

De klaankliere vaan de Drentse dialecte vertuine dudelek invlode en verwantsjappe vaan alle kante. Um te beginne vèlt op tot de westeleke klaanke *uu*, *oe* en *ie* in wäörd wie *huus*, *goed* en *niet* hiel wied nao 't ooste zien geavveceerd, dewijl zuidelek vaan Drente (in Twente en d'n Achterhook) de aw wäörd *hoes*, *good* en *neet* vööl wijer nao 't weste nog staand höbbe gehawwe. Ouch Groningsen invlood klink door: in vööl dialecte kin de *ee* 'n *ei* weure (in 't Gronings zelf, en dus ouch in 't noorde en noordooste vaan Drente, klink op dezelfde plaots 'n *ai*). Zoewel d'n invlood oet de westeleke dialecte es oet Groninge is mesjiens te verklaore oet 't lieg prestiesj wat Drente had: 't erm en lendelek gebed moot gere taolkinmerke vaan ander gebeier höbbe euvergenome. Get soortgelieks nump me trouwes aon veur de Veluwe.

In 't eigelek Drents blijf de vaan oersprunk korte meh allewijl lang *a* in wäörd wie *water* good behawwe. Dat steit in kontras mèt 't Gronings (wat de aajd-lang en de verlengde *a* samenum in *ao* of *oa*) en 't Stellingwerfs (boe-in de verlengde *a* in *ae* veranderd is). Daodoor kin me binne de provinciegrenze de volgende zinnekes hure:

- Zuidoos-Zanddrents: *Daor klatert het water tegen de glazen dat het daveret.*
- Zuidwes-Noord-Drents: *Daor klaetert het waeter tegen de glaezen dat het daeveret.*
- Noordenvelds: *Daor klaotert het waoter tegen de glaozen dat het daoveret.*

## Grammair

De grammair vaan de Drentse dialecte is neet in ein paragraaf te besjrieve. 'r Is dao wêrkelek neet uniform genoeg veur. Wat veur alle Drentse dialecte, boete die vaan Schoonebeek en Nieuw-Schoonebeek, opgeit is 't oontbreke vaan umalut in verkleinwäörd. In de Nedersaksische dialecte is de umlautslijn 'n belangrieke horizontaal loupende isoglos. 't Stellingwerfs en 't Gronings höbbe ouch gein umlaut in verkleinwäörd, 't Sallands, Twents, Achterhooks en vööl Veluwse dialecte wel.



't Einheidsmiervoud kin in 't Drents zoewel op *-t* es op *-en* oetgoon. De ierste meneer is normaol veur 't Nedersaksisch, de twiede is in principe typisch Gronings (vaan Friesen oersprunk, en ouch in 't Hollands presint). Toch löp de grens tösse *wij ma(o)ken* en *wij maa/okt* neet glik mèt de grens tösse Drents en Greunings. Sommege Veenkoloniaalse dialekte vörme hun miervoud gewoen op *-t*, en op de zandgrun in 't midde vaan de provincie vint me ouch enclaves boe-in 't miervoud op *-en* hiers.

In de mieste dialekte kump 't wäördsje *doe* neet veur. Dit is op versjèllende plaatse weer wel 't geval, neet allein in 't Noorderveld en de Veenkolonië, meh ouch in Schoonebeek.

## Dialekverluus en -behaajd

---

't Aondeil vaan dialeksprekers in de Drentse bevolking bedröög ongeveer de helf. Dit is relatief wieneg in verglieking mèt vööl ander dialekte in Nederland en 't Belsj. Umtot de mieste sprekers awwere en lieger opgeleide zien moot me 't Drents es bedreig besjouwe. 't Is neet oondinkbaar tot 't op termijn zal verdwijne of in de marge terech zal koume. Toch leef 't Drents nog dudelek oonder (e deil vaan) de jóngere. 't Succes vaan 'ne band wie Skik (zuug oonder) maak dat dudelek.

## Literatuur en muziek

---

't Drents weurt vrij vööl opgsjreve. 't Ierste gedrökde werk in 't Drents, vaan de haand vaan 'n zeker Barbara Maria van Lier (1751-1778). De Drentse literatuur is dös neet jónges es de Limburgse. In de negentiende ieuw volgde mie tekste, vööl gediechter en streekromans. In de twintegste ieuw, en zeker nao d'n oorlog, kaom d'r 'n groete productie op gaank. Zoe woort in 1953 de Drentse Sjrieverskrink opgeriech. Sins 1979 veurzuut 't blaad *Roet* ("oonkruid") in Drentse literatuur.

De Drentse muziek begós in 1940 mèt 't *Bonte Bitse Cabaret* oet Roden. In 1948 woorte *De Thrianta's* opgeriech. Drentstaolege muziek waor in de jaore nao d'n oorlog te hure op Radio Noord. Later woort 't Duo Karst in de ganse provincie populair. Roond 1980 kraoge The Dutch Boys en 't Börker Trio zelfs landeleke bekindheid mèt Drentstaoleg werk. Bij al dees grope geit 't veural um pretentieloeze fies- en/of volksmuziek. De bekindste en door muziekcritici mies gewaordeerde band woort in de jaore negeteg Skik oet Erica. Skik-zenger Daniël Lohues begós in de jaore 2000 'n solo-carrièr, ouch mèt Drentstaoleg werk. Mooi Wark is 'ne boerorockband oet Drenthe in de traditie vaan Normaal. De zengeres Martijje bringk jazzchteg repertoire in 't Drents.

't Drents woort in de jaore zeventeg hiel bekind es de taol vaan de tv-serie *Bartje*, nao 't gliknaomeg boek vaan Anne de Vries. 't Dialek woort hei neet oondertiteld.

## Rifferenties

---

1. <http://www.drentsetaol.nl/> "[A]lle dialecten die binnen de provinciegrèens spreken wordt, bint Drèents. Het iene dialect is niet beter as 't aandere; 't is... aans."

## Extern links

---

- Drentstaolege artikele op de Nederlands-Nedersaksische Wikipedia
- Stiechting Drentse Taol (<http://www.drentsetaol.nl/>)
- 't Verhaol vaan de Verlore Zoon in 't dialek vaan Meppel (<http://www.meertens.nl/books/winkler/meppel.html>) (Zuidwes-Zuid-Drents)
- Idem, in 't dialek vaan Zweeloo (<http://www.meertens.nl/books/winkler/zweeloo.html>) (Zuidoos-Zanddrents)

---

Aafkomstig van Wikipedia, de Vriej Encyclopedie. "<https://li.wikipedia.org/w/index.php?title=Drents&oldid=413624>"

---

**Dees pazjena is 't lèts verangerd op 2 mrt 2017, 19:01.**

De teks is besjikbaar ónger de [Creative Commons Naomsvermelding/Geliek Deile licentie](#). 't Is mäögelik dat aanvöllende veurwaarde van toepassing zeen. Betrach de [Algemein veurwaarde](#) veur mie informatie.